


鸿雪因缘图记

第2集

(清) 完颜麟庆 著 汪春泉 绘



浙江人民美术出版社

浙江出版联合集



中國藝術文獻叢刊

鴻雪因緣圖記

第二集

〔清〕完顏麟慶著 〔清〕汪春泉等繪

浙江出版聯合集團
浙江人民美術出版社

目錄

金安瀾 鴻雪因緣

南池志喜

第二圖記序

梁苑詠雪

龔自珍序

榴廳治書

趙廷熙序

鐵塔眺遠

第二集上册

鳳岡校獵

小照自題

大伾觀河

帝城展觀

藩署酬香

樂存謁師

再至侍選
宴臺訪碑

叙德書情

翠屏放牛

樞澗望雲

水口參燈

南陽訪舊

黔疆閱武

元妙尋蕉

獅巖趺坐

漢江曉渡

苗獮獻忱

桃源問津

扶風春餞

穿石窺光

圖雲卧轍

明月證經

牟珠探洞

玉屏問俗

飛雲攬勝

相見叱馭

西山鼓棹

雲頂踏雲

機巖志異

黔靈驗泉

清浪下灘

甲秀賞秋

流花泛湖

荆營驗馬

息壤考古

高明讀畫

妙高望月

第二集下冊

清晏受福

天然定志

平成濟美

福興起碑

清華品秋

貞應培堤

惠濟呈魚

西園賞雪

雲龍聯詠

焦山放鼉

三詔題名

別峰尋徑

海門坐雨

詠樓話舊

桃菴雅叙

謙豫編圖

汜光證夢

賞春開宴

湖心建塢

龜山問井

文匯讀書

洪澤歸帆

綠野泛舟

荷亭納涼

雙樹尋花

東園探梅

桃泉煮茗

河口問壽

金山操江

皂河喜雨

石公驗礮

龍門湖市

儀徵設局

福壽拜恩

智信宣防

梅花校士

芑香寫松

金安瀾 鴻雪因緣第二圖記序

夫謝傅功高，望酬朝野；燕公筆健，氣助江山。按部則甘雨隨車，移鎮則陽春有脚。造蒼生之福命，是大因緣；考赤縣之輿圖，有真經濟。倘不標題金石，潤色丹青，何以紀運甓之分陰，寫攜琴之寸抱哉。則有神清永叔，副本爭描；才富樊南，甲編早訂。華年敷歷，先工鸞手之摹；棠舍循行，新樂騶牙之咏、經綸道大，山水情深，如我年伯見亭麟公者，固泉壑之夔龍，衣冠之巢許也。公向有《鴻雪因緣圖記》，今又輯而增之。職領封圻，已逾十稔，相徵通貴，復繪三毫。狀鄴侯之九仙，撰會昌之一品。年倣麟經之繫，其旨數千；序符象服之朝，爲圖八十。幸捧函而雒誦，竊比類而參觀。今夫臣亮天功，薰廷之景運；孝爲人瑞，瓠史之名言。師友繫于周官，靈異參乎義易。心歌腹咏，慕漢吏之循聲；智

水仁山，悟宋儒之理趣。

揭其體要，詮厥因緣。

公績奏旬宣，榮膺晝接。廿七最剡書之冠，五六刻溫語之咨。韓忠獻建白褒誠，賜鹿胎之內膳；董師中焚黃給假，省馬鬣之先瑩。陳臬中州，平章庶獄。法刪杜律，風披棘木之清；奏釋堯塵，瑞吐榴花之燦。

命承重巽，道邇由庚，貴筑開藩，武昌填撫。上鮑照河清之頌，任寄宣防；際袁昂官達之年，字頒福壽。宣捷領戰圖之十，攝官佩節篆之三。恩遇之隆，其緣一也。

公何籌衍澤，陸社升馨。延年居官，履杜周之舊位；榮公養志，奉申國之徵音。經幔高懸，斑衣歡侍。蘭閨輯錄，補窈窕德象之篇；彤管徵詩，采澄景靈葩之句。堂顏再至，暉答三春。樂姑婦之談棋，品女孫之賦茗。

公之擢任黔陽也，路同蜀道之難，時緩崔輿之奉。梅花繪扇，深荷慈恩；棋澗瞻雲，曲伸孺慕。今雖感縈蒿蔚，景逝桑榆，而大體深知，獎承天語。遺容宛

在，畫倩神工。勝蔡母賜帔之褒，同丁子刻檀而祀。顯揚之報，緣又一也。

公學有淵源，味同沆瀣。濟州舊輔，授鉢傳衣；胥浦元臣，推襟送抱。識李沆之風度，決富弼之勲名。黃閣登庸，預贈吉祥之券；紅橋修楔，先憑丞相之茵。禮習龜劉，集同寮而校獵；字摹蚪篆，招良友而搽奇。獅峰趺坐之時，談偕釋子；鹿舺長鳴之候，秋辨騷人。贄文酬舉主之知，讀曲送使君之去。依紅泛綠，王侍中蓮幕之才；酌酒簪花，陳太傅藥欄之宴。賓延珠履，士度金鍼。氣誼之孚，緣又一也。

公文昌度世，古佛前生。光飛樓上之丹，靈驗祠中之琰。隱顧長康之葉，元妙尋蕉；助鄭巨君之風，汜光證夢。回道人懸壺之樹，仙跡留題；爰寄生吹笛之灘，神禽飛送。蓋立德功者，必關運數；懷忠信者，可涉波濤。螭蟠沉水之碑，嘉名預定；魚獲專車之骨，朱篆群觀。轉漕連檣，雨喜神龍之助；減流啓壩，汗驚泥馬之沾。尅禮河報祭之時，請星瀆昭靈之額。神貺之甄，緣又一也。

公胸羅璣斗，識炯晶燈。無蘇味道之模稜，有劉真長之鎮靜。慎終如始，奉

宸訓之周詳；濟猛以寬，副輿情之愛戴。疏清刷濁，速蜚漳水之芻；敷澤騰歡，瑞咏梁園之雪。指嚴程而叱馭，撫峒戶而頒條。材珍藥籠之儲，教同蜀郡；花禁米囊之種，治比崇陽。免瘠土之催科，旌生苗之孝義。蕩英徙節，蜀毳攀轅。驗額馬于荆營，探鎮犀于息壤。且也經明禹貢，楫作洪源。月堤衛貞應之祠，水志定天然之牖。列修防之器具，創繪全圖；建砌石之津梁，永占利涉。樓船習戰，威控三江；禹筴籌鹽，利通九府。爲萬民之慈父，洵一代之名臣。施濟之宏，緣又一也。

公符佩黃神，書披蒼水。詢俗勞褰帷之駐，哄騶減負弩之迎。古木寒烟，吊李唐之詞客；疏鐘清磬，游石晉之禪林。南陽本嶽降之區，歡迎臧獲；秦洞非津迷之地，誕闢神仙。石窟光圓，精參著理；甕灘地險，博證桑經。酌扁趺之靈泉，眺寵嵒之曉日。橘盃春餞，松炬宵燃。探宛委之書，洞天華妙；塑僧伽之像，梵相圓明。理燮陰陽，丙吉停車之問；恩周物類，孔愉篆紐之徵。抒懷則霽月光風，繪景則河聲嶽色。游觀之壯，緣又一也。況夫嶽視三公，崇銜日峻；波

澄千頃，宏量天成。雅頌同文，冠自題之韻語；韋平作相，卜繼起之勲猷。裴中立命值廉貞，張方平堂留畫象。則此八十圖者，殆初集之嬋連，後緣之嗶引乎。安瀾奉鑄顏之訓，驥尾趨塵；叨御李之榮，龍門侍列。序慚鄭亞，韻叶王筠。此時讀書高齋，常接九天欬唾；異日圖形傑閣，更看七寶莊嚴。謹序。

道光辛丑秋八月年家子金安瀾拜撰

龔自珍序

《鴻雪因緣圖記》者，兵部侍郎、江南河道總督長白麟公之所作也。自髫卯之歲至四十歲，爲圖八十，是爲弟一卷。自四十至五十爲圖復八十，爲弟二卷。其弟一卷，阮相國、祁尚書序之矣。道光辛丑秋，自珍游淮，以內閣後進禮謁公浦上，睟乎其容，慰勞有加，使自珍綴言于弟二卷之簡端。微公命，自珍固有所欲言，重以公命，烏能無言。古今名臣碩輔，所遇之世不齊，爲承平之臣易乎？爲憂勞況瘁、盤根錯節、立奇功、戡大變之臣易乎？則必曰：「爲承平者易矣。」雖然，固有辨。今使所遇而永永承平無事也，起家科名，致身華臚，一切勿問，固不得預于賢大夫之數，其人固良易賢矣，不甘以科名華臚竟矣，不過博覽書史，周知掌故，上足以備人主燕閑之顧問，宦轍所至，宏獎士類，進其春華

秋實之士而揚挖之，其人雖賢，誠無甚難及者；若乃內韞韜略，外示紆餘，蓄孟門、積石于方寸，可以談笑生風雷，而汪洋澹涵，沖乎夷易，使人不見駛疾募賊之跡。猝有事變，投袂而起，若勁弩激箭之發，若儲之數十年于其懷裒間者，之人也，蓋于天下可以常、可以變之全局大勢爛熟于胸中，而不可方物，以透迤于承平華臚者也，斯豈尋常意計所能以肫軒輊者。今我麟公則殆其人哉，殆其人哉。百有六十圖，雖亦談人倫之樂事，侈門內之祥和，簪筆以入，秉輶以出，無亢厲之言，有迴翔之態。公弱冠通籍于全盛之朝，家世翔華，山川清宴，宜其然也。然而微窺公行部所及，山川形勢，人民謠俗，古跡今狀，皆備載之，弗爲無本之說，與不急之言。而又問民生之疾苦，討軍實之有無。天下形勢，半在于是，而姑韜晦其所學，不欲張大其名目，以託于百六十篇之繪事記云爾。即如在南河，箸《河工器具圖說》四卷，古今之奇作，天下有用之書，孰加于是。然其目不過曰謙豫編圖，非其章章明諷耶。今天下承平日久，而海氛未靖，此公所以有石公驗礮之舉也。公以河督兼署制軍，特小試其端耳。天子且益大用公。公行

且總攬四海財賦而籌之，使公私上下交裕，然後入相天子，激揚清濁，煥發士大夫之耳目，以振厲一世，此海宇所喁喁望公者，百六十篇皆其嚆矢也。更十年，自珍當更序之，敬濡筆以俟。

道光二十一年歲次重光赤奪若孟秋上旬三日內閣後進仁和龔自珍頓首拜纂

趙廷熙序

道光辛丑秋七月，見亭夫子出《鴻雪因緣圖記》見示。前後俱八十圖，圖繫以說。第一卷，祁春圃尚書已爲之叙矣。其第二集，蓋陳臬河南，握節黔、楚及總制南河時所作。熙喜奉音塵，頓開眼界。敬申惶引，用附瓣香。竊聞稟川嶽之精者，其氣必引星辰而上；懋鼎鐘之績者，其福必綿江海而長。繫古簪筆之臣，綴文之士，攤華揚藻，研都鍊京，大抵抒聞見之恢奇，撫山川之寥闊。然而蜀程紀行，未攬九埏之勝；吳船著錄，終輸五嶽之游。未有督作八州，集稱一品，悟金粟之前因，範模山水；印雪泥之舊爪，供養烟雲，如我見亭夫子之紀續舊游，圖成新製者也。以夫子金源世胄，鐵券家聲，蚤掇巍科，洊躋華省。自東郡趨庭，南陔奉職，褰帷問俗，露冕觀風。東長生請雨之歌，趙廣漢鋤筒之頌，固已

風行列郡，圖畫百城矣。進尹河南，時陳臬事，喜鵲巢之似鼓，當燕寢之凝香。叙庚郵而弁語新題，編乙部而繪國更始。李鄴侯本神仙風度，謝太傅有山澤間儀。時則彤廷述職，丹陛趨風。朝頒玉瑞，溫綸宏錫類之恩；衣染鑪香，優詔上先人之冢。遂乃訪洛下之耆英，謁山中之宰相。游紀南池，古隸重摹釋續；居尋東院，新詩競和尖叉。日照榴花之色，鑑丹忱而獄反沈冤；風傳塔寺之鈴，鑄精鐵而閣成平等。小隊弓刀，射期門之狡兔；大河牲玉，觀守相之蜚魚。既而白鹿夾車，綠熊憑軾。伊闕龍門，膺屯日屏藩之任；蘭膏鳳髓，酬當年盃玦之靈。詩編名媛，選搜備采中聲；記訪叢臺，碑式旁參大統。迨使節星移，士林雨泣。父老百錢，競攀轅而卧轍；詞人一齣，爰叙德以抒情。洵足以紀嵩少之游，補夢華之錄已。然而蘆笙銅鼓，地無三里之平；瘴雨雲烟，天有十旬之漏。難攜仙眷，莫奉溫輿。采赤萁而星繁，望白雲而天遠。溯旗鈴之誕降，美旌節之重臨。黃襪保母，話往事而龍鍾；白首門丁，述迎親而雀躍。碑墮淚而龜趺宛在，蕉覆隍而鹿夢依然。滄浪覓渡，緬山甫之遺封；古洞尋源，指淵明之舊宅。峽轉空舫，穿

石猶傳馬援；匯參明月，遺經足證桑欽。已過湘女之祠，遂抵竹王之廟。椎髻桶裙，坐鎮直同于黔國；沙行繩渡，叱馭遠過乎王尊。雲生足下，龍從蚤度巖關；泉落山巔，虬箭如浮刻漏，聽媿女之歌，秋延甲秀；說生公之法，厄解丁庖。觀燈水口，遙知西嶼之明霞；演武華廳，盡選南天之赤羽。虎嶺獅峰，改土歸流者咸知耕種；蠻花獠鳥，褒忠教孝者悉被旌揚。當行省之移旌，屬扶風之祖道。酌橋酒而詩成座上，戴椰瓢而淚墮杯中。亦復搜珠洞之奇，覽月潭之勝。羽陵仙蠹，穆天子之藏書；木篠懸壺，回道人之奇跡。鳶點水而蛇蛻巖，灘聲攪夢；魚秤水而鴉啜食，湖水流花。五營烙印，先歌考牧于荆門；九澤安瀾，允踐成功于息壤。又不僅考湖湘之逸事，續委宛之餘編矣。

且夫江漢朝宗，同受尾閭之洩；淮黃濟運，上通星宿之源。帝念宣防，勅監都水。乃甫拜皇華之命，遽興風木之悲。憫王事之賢勞，降天章之優渥。隴卜紅簫，致呦呦之馴鹿；林森孝筍，瞻啞啞之慈烏。蓋身許馳驅，心存蘊結。福賜奎章，雅合園名清晏；衡平心秤，欣看牖定天然。故纘思禹服，頌平成者不伐不